

四庫全書

集部

欽定四庫全書

集部

漢魏六朝百三家集卷五十二

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官編修臣盧遂

膳錄監生臣劉紳

欽定四庫全書

漢魏六朝百三家集卷五十一

晉陸雲集

目錄

詩

大將軍宴會被命作詩

六章

征西大將軍京陵王公會射堂皇太子見命作

此詩

六章

太尉王公以九錫命大將軍讓公將還京邑祖

餞贈此詩

六章

大安二年夏四月大將軍出祖王羊二公於城

南堂皇被命作此詩

六章

從事中郎張彥明為中護軍

六章

贈汲郡太守

八章
有序

贈顧驃騎二首

有皇

八章
有引

思丈八章
有引

贈鄱陽府君張仲膺五章

贈顧彥先五章

答顧秀才五章

答大將軍祭酒顧令文五章

答吳王上將顧處微九章

贈顧尚書

答兄平原

贈鄭曼李四首

谷風

有序
五章

鳴鶴

有序
四章

南衡

有序
五章

高岡

四章

答孫顯世

十章

失題

八章

失題

六章

失題

失題

答兄平原

答張士然

為顧彥先贈婦往返四首

笑集

漢魏六朝百三家集卷五十一目錄

欽定四庫全書

漢魏六朝百三家集卷五十一

明
張溥
輯

晉陸雲集

詩

大將軍宴會被命作詩

六章

皇皇帝祐誕隆駿命四祖正家天祿保定敵哲惟晉世
有明聖如彼日月萬景攸正

巍巍明聖道隆自天則明分爽觀象洞玄陵風叶紀絕
輝照淵肅雍往播福祿來臻

在昔奸臣稱亂紫微神風潛駭有赫茲威靈旗樹旆如
電斯揮致天之屈于河之沂有命再集皇輿凱歸

頽綱既振品物咸秩神道見素遺華反質辰晷重光協
風應律函夏無塵海外有謚

芒芒宇宙天地交泰王在華堂式宴嘉會玄暉峻朗翠

雲崇藹冕弁振纓藻服

五臣作火

垂帶

祁祁臣僚有來雍雍薄言載考承顏下風俯覲嘉客仰
瞻玉容施已唯約于禮斯豐天錫難老如岳之崇

征西大將軍京陵王公會射堂皇太子見命作

此詩 六章

芒芒太極玄化烟煴顏形成器凌象垂丈大鈞造物庶
類羣分先識經始實綜彞倫

惟嶽隆周生甫及申天鑒在晉祚之降神邈矣遐風茂
德有鄰永言配命惟晉之鎮

厥鎮伊何實幹心膂文教內輔武功外禦淮方未靖帝
曰攸序公于出征奄有南浦

南海既賓爰戢干戈桃林釋駕天馬婆娑象齒南金來
格皇家絕音協徽宇宙告和

玄綱峻極天網既紘文武方升允茲兼弘我我高夏有
肅其涼公侯戾止騶驥龍驤善問如林在會鏘鏘

祝融御節火正緝熙凱風徘徊萬物欣時秩秩初筵薄
言在茲嘉福介祐萬壽無期

太尉王公以九錫命大將軍讓公將還京邑祖

餞贈此詩 六章

烈丈夫辟公時惟哲王闡縱絕期平顯幽光內實慎徽緝
熙有藏出紂方慝間督不揚高山峻極天造芒芒

天子念功大典光備肅肅王命宰臣蒞事穆矣淵讓遺
功遂志思我遠猷徽音孰嗣

后命既靈王人返旆興言出祖飲餞于邁旂旐決決軺
軒藹藹和風弭塵清暉映蓋

思樂中陵言觀其川公王戾止有車輶輶伊誰云饗我
有嘉賓羽觴舉醕酢爾征人

悠悠征人四牡駢駢發軫北京振策紫微昔乃云來春
林方輝歲亦暮止之子言歸道途興戀伏載稱徽

聖澤既渥嘉會惜惜庭旅鐘鼓堂有瑟琴飛轡清暉扶
桑移陰視景祗慕揮袂沾襟變彼同栖悲爾異林我有
旨酒以歌以吟

大安二年夏四月大將軍出祖王羊二公於城

南堂皇被命作此詩

六章

時文唯晉天祚有祥聖宰作弼受言既臧有赫斯庸勲
格昊蒼景物台暉棟隆玉堂

惟帝思庸大興光迪聖敬遠躋神道玄邈思媚三靈誕
膺天篤嘉命既辱王人言告

翼翼王人言告惟慕公輿駕言乃眷斯顧華旂飛藻鳴
鸞振路駢駢駟牡噓天載步

我有高厦如雲斯薈雕軒戾止薄言嘉會問誰在宴惟

俊惟又豐俎殷薦獻酬交泰

悠悠昊天南正興言朱明有暉萬葉翠繁昌雲垂天凱
風熙顏王臣在此貽宴于懽

懸象西頽虞淵納景嘉樂未晞嚴駕已整行矣征人身
乖路永飛驂顧懷華蟬引領遺思北京結轡臺省

從事中郎張彥明為中護軍

六章

思文有聖叡哲配天功濟生黎道合上玄休命發揮有
集惟賢哲彼寤宿澄此在淵

濟濟多士實播令聞王曰欽哉余嘉乃勲徽音孔碩惠
爾風雲穆此芳烈肇揚清芬

肅肅庶僚袷服寵暉肇彼挑蟲假翼翻飛出撫邦家入
翔紫微有命既集願言永違

思樂華堂雲構崇基公王有酒薄言饗之景曜徽芒芳
風詠時宴爾賓儉具樂于茲

豐豐我王豐恩允臧我客戾止飲酒公堂自彼下僚聿
來有光悲矣永言指途逝將形違殿闥景附華房

開國承家勿用小人令我聖宰實蕃斯仁凌淵龍躍披
林鳳振正直既好嘉禮式陳振我遠德歸于時民

贈汲郡太守

八章
有序

奚世都為汲郡太守客將之官大將軍崇賢之德
既遠而厚下之恩又隆非此離析有感聖皇既蒙
引見又宴于後園感鹿鳴之宴樂詠魚藻之凱歌
而作是詩

於穆皇晉豪俊實蕃天網振維有聖貞觀鳴鳥在林良

駿即閑萃彼俊人時亮庶官

抑抑奚生天篤其淳芳頴蘭輝瓊光玉振沈機照物妙
思考神思我善問觀德古人

善問伊何惠音孔昭肇允衡門翻飛宰朝肅雍芳林芬
響凌霄穆矣和風育爾清休

亦既有試出宰邦家之子于行民固謳歌風澄俗儉化
靜世波芒芒既庶且樂予和

我有好爵既成爾服入贊崇華遂登帷幄時文聖宰天

祚方穀朔風徽止鴻漸雲嶽

悠悠斯民三代直道我求明德惟奚攸考緝熙暉章天
祿來保惠心無競豐化有造

樂只君子茂德攸綏嗟我懷人式是言歸聿言來集如
翼斯揮曰予不惠照爾清暉

職思既殊亦各有司念我同僚悲爾異事之子之遠悠
悠我思雖無贈之歌以言志

贈顧驃騎二首

有皇

八章
有引

有皇美祁陽也祁陽秉文之士駿發其聲故能明
照有吳入顯乎晉國人美之故作是詩焉

有皇大晉時丈憲章規天有光矩地無疆神篤斯祐本
顯克昌載生之雋實惟祁陽哲問宣猷考茂其相

於鑠祁陽誕鍾天篤清輝龍見玄猷淵嘿沈機響駭幽
神廣觀和以同人歸物時育有大惡盈謙以自牧思我
懿範萬民來服

吳未喪師天秩有庸淵哉若人弱冠休風俯翼黃門以德來忠端秀蕃后正色儲宮徽音鏘頤邈矣遐蹤

粵惟南紀舊邦匪歆委弁釋位如龍之潛考盤窮谷假樂豐林子雖藏器鐘鼓有音惠風往敬慶問來尋

濟濟元公相惟天子明明辟王思隆多士帝曰欽哉有命集止我咨四方令問在爾以朕大賚乃膺嘉祉聿來胥步觀國之紀

惟皇建極緝熙清曜我有俊民明德來照大觀在上王

假有廟顯允顧生金聲玉振之子于升利見大人龍輝
絕跡有肅清塵

清塵既彰朝虛好爵敬子侯度慎徽百辟予聞有命得
禮不易嗟我懷人瞻言永錫豐水東注惟子之績

遵汶涉泗言告同征勁風宵烈湛露朝零雲垂藹下泉冽
清泠哀哉行人感物傷情從子京邑言觀厥成天保祚
德式穀以寧

思丈

八章
有引

思文美祁陽也祁陽能明其德刑于寡妻以至於
家邦無思不服亦賴賢妃貞女以成其內教故作
是詩焉

思文祁陽祁陽克峻天錫純嘏宣茲義問德音既烈海
外有奮既奮斯音祇敬厥德昭治其家覃及邦國永肇
儀刑俾民惟則

文王在上太姒思齊魯侯克昌亦賴令妻鑒神有顧
繫在斯祁陽載天作之伉儷

在虞之胄實惟有姚穎艷玉秀華茂桃夭居顯祇明在
靈格幽清塵熠燿淑心綢繆爰及祁陽惟德之周

其德伊何和貞履素虔告師氏言謀慮度鍾鼓思樂靖
端夙賦考休攸嬪來嫁于顧

羔羊執贄玉帛有輝百兩集止之子于歸宗姻風從娣
姪雲回祁陽顧之煥其盈闕

既曰歸止式揚好音言觀河洲有集于林思樂葛藟薄
采其葍疲彼攸遂乃孚惠心

惠心既孚有恪中饋敦此螽斯永錫嗣類載延窈窕用
和寤寐神之聽之眉祚來瑞

昔周之隆有任有姒內刑聖教外崇多士今我淑人實
亮君子疊疊翼翼亦繼斯祉宜爾子孫福祿盈止

贈鄱陽府君張仲膺

五章

神林何有奇華妙實皇朝如何窮文極質斌斌君子升
堂入室太上有曜子誕其輝知幾曰難子達其微入輔
帷幄出御千里滔滔江漢南國之紀

謁帝東堂剖符南征天子命我車服以榮何以潤之德
被蒼生何以濟之威振羣城却愚以化崇賢以仁鳳舒
其翮龍濯其鱗憶彼荒敷莫敢不賓雖云舊邦其命維
新

卞和南金終始一色顯允君子窮達一德弘仁厲道物
究其極古賢受爵循牆虔恭今哲居貴履盈如冲接新
以化愛舊以豐隆此嚶鳴悖彼谷風

忠至寵加孝至榮集內崇南芬外清名邑煒煒棠隸負

增其華猗猗桑梓厥曜孔多被繡畫行昔人攸美階雲
飛藻孰與同粲

人道伊何難合易離會如升峻別如順淇嗟我懷人曷
云其來願言執手涕既隕之

贈顧彥先

五章

玄黃挺秀誕受至真行該其高德備其新光瑩之偉隋
卞同珍騰都之駿龍鳳合塵

皇皇明哲應期繼聲華映殊域實鎮天庭入輔出輔乾

乾靡寧夏發涼臺我雨我暑冬違邦族風霜是處嗟彼
獨宿誰與晤語飄飄艱辛非禹孰舉言念君子悵惟心
楚

悠悠山川驍驍征遐陟升焦堯降涉洪波言無不利乘
嶮而嘉人懷思慮我保其和

邂逅相遇良願乃從不逢知己誰濟予躬莫攀莫附媿
我高風時過年邁掩冉桑榆晞光賴潤亦在斯須假我
夷塗頓不忘驅汜予津川浮不失掇無愛餘暉遂暗東

岵

幽幽東岵戀彼西歸瞻儀情感聆音心悲之子于邁夙
夜京畿王事多難此焉徘徊

答顧秀才

五章

芒芒上玄有物有則厥初造命立我藝則爰茲族類有
覺先識斯文未喪誕育明德

允矣顧生載靈之和沈根芳沼濯秀蘭波淵翹戢穎景
茂凌華惟是德心是用閑邪

德心伊何行歸于周希高仰峻企遠懷悠匪願在明靡
倦斯幽凡我同明瞻言清休

慎終追遠俾民歸厚言若有行及予攜手何以恤我其
仁孔有心之云愛隆敬其久

既邁斯仁亦迪茲文藻不雕樸華不變淳有斐君子如
珪如璫仰欽德類依懷惠詮式揚好問邦家于宣

答大將軍祭酒顧令文

五章

惟林有鸞惟淵有螭顯允明德實邦之基先后陟恪子

配于茲遵彼玉堂受言邁之

中原有軌世鮮克蹈先民有懷子探其妙心猶水鑒函
景內照名若振炎攄光外耀

相彼水鑒民胥攸臨矧曰明德人誰弗欽寫我朶頤即
爾澄心義隆自古好邈在今

大人有作興雲自天之子于升亦躍于淵景曳清霄響
發鳴弦義問弘集淑風載鮮

企予朔都非子孰念豈無弱翰才不克瞻惠音聿來瓊華

玉艷無德不報念辭惟忝

答吳王上將顧處微

九章

邈矣大昧造化明明物以曲全人以直生類聚百族羣
分萬形員淵挺隋方川吐瓊

謁謁洪族天祿攸蕃神綏厥本道裕其源條有豐葉波
無輟瀾烈風時播芳響世繁

曰繁曰賸載德于茲克丈克敏乃惠乃慈遵彼洪流薄
言詠之好是神契聊與之期

仁勇同宅文武相紛王謂御事誰撫上軍於時翻飛虎
嘯江濱式遏不虞俾也無塵

三代既遠直道垂音非齒焉尚非德焉欽鑽仰自古鮮
曰在今匪唯形交殷薦其心

心以殷薦分以道成祇服惠顧疇此深情亦有芳訊薄
載其誠豈無春暉茲焉可榮

大道易聞崇軌難襲孰云匪愆咎吝尤集敢謝不佞栖
山自戢臨篇焉愧德輶辭輯

翩彼日月逝猶駭電朝華未厭夕風已扇詩亦有悲無
幾相見懷德歎心于焉東眷

平津晚貴貢公後徵陟彼玉階黃髮來升靈卉三秀芳
草秋興唯願清神福祿是膺

贈顧尚書

五嶽降神四瀆炳靈兩儀鈞陶參和大成兆光人倫誕
育至英於顯尚書實惟我兄行成世則才為時生體道
既弘大德允明厥弘伊何靡曠不遵厥明伊何靡妙不

研無索昭灼有求幽玄細微不錯毫芒以陳積實為山
納流成淵扶翹布華養物作春所肅以禮所潤以仁宣
質拔行曜文入采堅不可鑽清如凝水方迹迎艮蹈齊
闕里希聖而微亦顧之子棄彼芝英玩此蘭茝異世同
芳其馥不已我蘭既馥我風載清能芬南岳遂芳北征
子有其德人求其馨逝此陋巷薰彼紫庭厥音不已鼓
鐘有聲聞天之聰譬之鵠鳴天聰既昭我實惟彰乘風
之鳳眷言朝陽披雲藻繡來此舊鄉謙光自抑厥輝愈

揚麗容既翕孔好已張既照平林具我華英華英已曜
餘光難延會淺別速哀以紹欣追曠同塗暫和笑言殊
音合奏曲異響連絕我懽條統我思根因分來在愛感
徃恩我非形景有處有遊載離載會且懽且憂感彼遠
曠咨此延娛樂奏聲哀言發涕流惟願我子德與福俱
亦天之祐亦我之私

答兄平原

伊我世族太極降精昔在上代軒虞篤生厥生伊何流

祚萬齡南嶽有神乃降厥靈誕鍾祖考徹茲神明運步
玉衡仰和太清賓御四門旁穆紫庭紫庭既穆威聲爰
振厥振伊何播化殊鄰清風攸被率土歸仁彤弧所彎
萬里無塵功昭王府帝庸厥勲黃鉞授征錫命頻繁闕
如虢虎肅絃三軍光若辰峙亮彼公門仍世上司芳流
慶純雲和所產爰育二昆誕豐岐嶷夙邁令聞令聞伊
何休音允臧先公克構乃崇斯堂耀穎上京發迹扶桑
戎車山征時惟鷹揚鷹揚既昭勲庸克邁天子命我鎮

弼于外在作扞城以表南裔降災匪蠲景命顛沛惟我
賢昆天安秀生含奇播殊明德惟馨太陽散氣乃稟厥
和山川垂度爰則厥遐厥遐伊何惟光惟大惟大伊何
如岱如渭恢此廣淵廓彼弘懿洪道惇德淵哉為器統
我先基弱冠慷慨將弘祖業實崇奕世咨予頑蒙蕞爾
弱才沈耀玄渚挹庇雲淇陶化靡移固陋于茲瞻仰洪
範實忝先基巍巍先基重規累構赫赫重光遐風激驚
昔我先公爰造斯猷今我六蔽匪崇克扶悠悠大道載

邈載遐洋洋淵源如海如河昔我先公斯綱斯紀今我
末嗣乃傾乃圯世業之頽自予小子仰愧靈丘銜憂沒
齒憂懷惟何顧景惟塵我我高蹤眇眇貞辰明德繼體
莫非哲人今我頑鄙規範靡遵仍世載德荒之予身莫
峻匪岳有峻斯登莫高匪雲有高斯凌矧我成基匪克
階升玄黃長坂載寐載興豈敢憚行哀此負乘芒芒高
山自予頽之濟濟德義匪予懷之終銜永負予其媿而
昔予言曠汜舟東川銜憂告辭揮淚海濱義陽趣駕炎

華電征自我不見邈哉八齡悠思迴望寤言通靈昔我
往矣辰在東嶠今我于茲日薄桑榆銜艱邁愍困瘁殷
憂哀矣我世匪蒙靈休開元迄茲震興迭微弱風隱駭
海水羣飛王旅南征闡耀靈威予昆乃播爰集朔土載
離永久其毒太苦上帝休命駕言其歸多我邁愍振蕩
朔垂羈繫殊俗初願用違嚴駕東征肅邁林野夕秣乘
馬朝整僕旅矯矯乘馬載驅載馳漫漫長路或降或階
晨風夙零朝不遑飢傾景倏墜夕不存罷雖有豐草匪

釋奔駟雖有重陰匪逞假寐梵梵僕夫悠悠遠征經彼
喬木有鳥嚶鳴徵物識儕矧伊有情樂茲棠棣實歡友
生既至既覲滯思曠年曠年殊域覲未決辰恨其永懷
憂心孔艱天地永久命也難長生民忽霍曷云其常我
之既存靡績靡紀乾坤難並寂焉其已生若電激沒若
川征存愧松柏逝慚生靈匪吝性命實悼徒生苟克析
薪豈憚冥冥瞻企皇極徼福上天冀我友生要期永年
昔我先公邦國攸興今我家道綿綿莫承昔我昆弟如

鸞如龍今我友生凋俊墜雄家哲永徂世業長終華堂
傾構廣宅頽墉高門降衡脩庭樹蓬感物悲懷愴矣其
傷惇仁汜愛錫予好音晞光懷寶煥若南金披華玩藻
曄若翰林詠彼清聲被之瑟瑟味此殊響慰之予心弘
懿忘鄙命之反覆敢投桃李以報珠玉冀憑光蓋編諸
末錄

贈鄭曼李四首

谷風

五章
有序

谷風懷思也君子在野愛而不見故作是詩言其
懷思之也

習習谷風扇此暮春玄澤陞潤靈爽烟煴高山熾景喬
木繁興蘭波清踴芳許涼增感物興想念我懷人

習習谷風載穆其音流瑩鼓物清塵拂霖雨嘉播有
淪淪陰歸鴻逝矣玄鳥來吟嗟我懷人其居樂潛明發
有想如結予心

習習谷風以溫以涼玄黃交泰品物含章潛介淵躍候

鳥雲翔嗟我懷人在津之梁明發有思淩波褰裳

習習谷風其集惟高嗟我懷人於焉逍遙鸞栖高岡耳
想雲韶拊翼墜夕和鳴興朝我之思之言懷其休

習習谷風其音孔嘉所謂伊人在谷之阿虎質山嘯龍
輝淵蟠維南有箕匪休其和有棣斯畢俾爾滂沱懿厥
河漢惟彼太華明發有懷我勞如何

鳴鶴

四章
有序

鳴鶴美君子也太平之世君子猶有退而窮居者

樂天知命無憂無欲懷碩人之考槃傷有德之遺世
故作是詩也

鳴鶴在陰戢其左翼肅雍和鳴在川之側假樂君子祚
爾明德思樂唐虞歸于其極嗟我懷人惟馨黍稷
鳴鶴在陰其鳴喈喈垂翼蘭沼濯清芳池假樂君子其
茂猗猗國之瑋寶有餐瓊瓌乃振褰裳襲爾好衣嗟我
懷人啓襟以希

鳴鶴在陰其儀藹藹謂天蓋高和音于邁假樂君子篤

膺俊入穆風潛烈興雲戢舊德茂當年時衍嘉會安得
攀藻改爾縞帶嗟我懷人心焉忼愾

鳴鶴在陰載好其聲漸陸儀羽遵渚回涇假樂君子祚
之篤生德耀有穆如瑤如瓊安得風帆深濯爾纓景遺
雲雨爾在北溟嗟我懷人惟用傷情

南衡

五章
有序

南衡美君子也言君子邈世不悶以德存身作者
思其以德來仕又願言就之宿感白駒之義而作

是詩焉

南衡惟嶽峻極昊蒼瞻彼江湘惟水泱泱清和有合俊
人以藏天保定爾茂以瓊光景秀濛汜穎逸扶桑我之
懷矣休音峻揚

穆穆休音有來爾雍沈波涌奧淵芳馥風僚虛養恬照
日遺蹤考槃遵渚思樂潛龍我之懷矣寘爾華宮
和璧在山荆林玉潤之子于潛清輝遠振克稱輔德作
寶有晉和聲在林羽儀未變我之懷矣有客來信

風雲有作應通山淵清琴啓彈宮商乘絃類族知感有
命自天夷叔希世猶謂比肩矧我與子姤會斯年
我之懷矣在彼北林北林何有於煥斯文瓊瑰非寶尺
牘成珍豐華非妙得意惟神河魴登俎遺答清川

高岡 四章

瞻彼高岡有猗其桐允也君子實寶南江員規啓俗沈
矩履方泳此明流清澗川通陟彼衡林味其回芳

馥馥回芳綢繆中原祁祁庶類薄采其芬棲遲泌丘容

與衡門聲播東汜響溢南雲

穆穆閭闔南端啓籥庶明以庸帝聽式闕有鳳乎潛在
林棲翮非予之作孰與好爵

幽居玩物顧景自顧發憤潛帷仞佛有思予美忘此終
然胥來企予與言惟用作詩

答孫顯世十章

邈矣上祖垂休萬葉廣問弘被崇軌峻躡高山克荒大
川利涉繁藹惟祐風連雲接

大人有作二后利見九功敷奏七德殷薦鼎寶重芳勞
烈再扇奕世弘道天祿來宴

道弘振古祚未替今如彼在川亦有浮沈大韶既素響
非我音豈曰荒止塗弗克尋

昌風改物豐水易瀾百川總紀四海合源在彼焉取聿
來莫觀曾是褊心敢忘丘園

員暉偏照玄澤謬盈發彼來華頓此增城絕景靈雲倦
遊紫庭匪曰能知實忝長纓

煥矣金虎襲我皇猷孰云匪吝仰媿蒼流往蹇來反弭
迹一丘變彼東朝言即爾謀

振振孫子洪族之紀志擬龍潛德配麟趾引服朗節克
明峻軌遵彼中皐於穆不已

於穆不已大都是階之子于命民應如隕厚德時邁協
風允諧惠此海湄俾也可懷

乃眷丘林樂哉何曲解紱被褐投印懷玉遺情春臺託
蔭寒木言念伊人溫其在谷

道侯人行辭以義輯和容過表余未云執惠音弘播清
風駿集懷德形懽臨篇景立

失題八章

悠悠縣象昭回太素清濁迭興升降啓度遺和既爽李
春告暮朱明來思青陽受煦

日征月盈天道變通太初陶物造化為功四月惟夏南
征觀方凱風有集飄飆南窓思樂萬物觀異知同

有滄萋萋甘雨未播黍稷方華中田多稼庭槐振藻園

挑阿那薄言觀物在堂知化

蓬戶惟清玩物一室明發有懷念昔先哲通夢幽人彷彿遺烈清暉在天孰與永日

乃啓遺籍恣予大觀幽居傲物顧景怡顏況惟解舞衡門重闕思媚古人有懷良盤沈曦含輝芳烈如蘭

厥初生民有物有類自古有稱大寶以位烝徒式好駿奔攸遂啓予有聞誨爾達貴

達貴伊何天爵無榮渾淪大昧混其濁清毀方遯象遺

碩履貞道實藏器景以昭形

芒芒陋世奚競奚錯收彼紛華委之冲漠標志垂天矯
心馮閣通好莊聘儀刑有作安得達人顧予命薄

失題 六章

思樂芳林言采其菊蘅薄遵塗中原有菽登彼脩巒在
林寤宿彷彿佳人清顏如玉

予美亡此誰為適道容與俟之玄髮方皓躑躅山阿玩
此芳草願飡其穎庶以遺老

疊疊嘉時飄忽棄予有瞻逝深永歎潛許登願扶桑仰
結飛晷伊人匪存遺芳孰與

精氣為物或降或升徂落攸往神奇有登死生為徒存
亡曷勝謂予不信遺籍有徵

閒居外物靜言樂幽繩樞增結甕牖綢繆和神當春清
節為秋天地則通戶庭已悠

嗟彼懷人悠悠其潛念昔先烈有懷所欽駭情玩俗寶
允南金瓊輝邈矣誰適為心明發興言忼慨芳林

失題

美哉良友稟德坤靈明照遠鑒幽微研精超跡皇英質
如瑤瓊贈我翰林示我丹誠道同契合體異心并自頃
西徂合于五樓遲想歡懽觀我良疇亦既至止願言莫
由室邇人隔中情則憂抱恨來遊神往形留何以含忍
寄之此詩何以寫思記之斯辭我心愛矣歌以贈之無
秘爾音不我是貽

失題

有美一人芳問芬葩嗟我欽羨夢想光華亦既至止上
下欣嘉德馥秋蘭容茂春蘿淑似令娣惟予陋何雖有
良友朽木難加愛樂朋規贈以斯歌皆能載之其美孔
多嗟痛薄祐並罹哀苦堂構既崩過庭莫覩我悴西鄰
子沈東土契濶艱辛誰與晤語身滯情往神遊景處發
夢宵寐以慰延佇

答兄平原

五言

悠悠塗可極別促怨會長銜思

善作思

戀行邁興言在臨

鴈南津有絕濟北渚無河梁神往同逝感形留悲參商
衡軌若殊迹牽牛非服箱

答張士然

行邁越長川飄颻冒風塵通波激枉渚悲風薄丘榛脩
路無窮迹井邑自相循百城各異俗千室非良鄰歡舊
難假合風土豈虛親感念桑梓域髣髴眼中人靡靡日
夜遠眷眷懷苦辛

為顧彥先贈婦四首

我在三川陽子居五湖陰山海一何曠譬彼飛與沈目
想清慧姿耳存淑媚音獨寐多遠念寤言撫空衿彼美
同懷子非爾誰為心

悠悠君行邁斃斃妾獨止山河安可踰永路隔萬里京
室多妖冶粲粲都人子雅步擢纖腰巧笑發皓齒佳麗
良可美衰賤焉足紀遠蒙眷顧言銜恩非望始

翩翩飛蓬征郁郁寒水縈遊止固殊性浮沈豈一情隆
愛結在昔信誓貫三靈秉心金石固豈從時俗傾美目

逝不顧纖腰徒盈盈何用結中款仰指北辰星

浮海難為水遊林難為觀容色貴及時朝華忌日宴皎
皎彼妹子灼灼懷春粲西城善雅舞總章饒清彈鳴簧
發丹脣朱絃繞素腕輕裾猶電揮雙袂如霧散華容溢
藻幄哀響入雲漢知音世所希非君誰能讚棄置北辰
星問此玄龍煥時暮復何言華落理必賤

笑渠

綠房含青實金條懸白璆俯仰隨風傾煒燁照清流

漢魏六朝百三家集卷五十一

欽定四庫全書

漢魏六朝百三家集卷五十二

晉成公綏集題詞

東郡成公子安賦心不若左太沖史才不若袁
彥伯其在晉文苑與庾仲初曹輔佐兄弟也嘯
賦見貴於時梁昭明登之文選激揚嘽緩彷彿
有聲然列於馬融長笛嵇康琴賦亦彈而不成
矣賦少深致而序各有思讀諸賦不如讀其序

也樂歌施於廊廟揆之雅頌不知其中何篇也
晉世郊廟燕射鼓吹舞曲皆有詞其篇章見名
者傳玄張華荀勗成公綏曹毗王珣耳辭每雷
同傳稍出羣子安得與茂先接塵其人幸甚欲
如漢郊祀歌之練時日鼓吹鐃歌之朱鷺則真
曠代矣隸勢善於說字若有宮商角組亦陸機
文賦之流乎

目錄

賦

天地賦

有序

木蘭賦

有序

雲賦

柳賦

琵琶賦

大河賦

琴賦

時雨賦

棄故筆賦有序

芸香賦

烏賦有序

陰霖賦

延賓賦

嘯賦

蜘蛛賦

螳螂賦

洛襖賦

鴻雁賦

有序

鸚鵡賦序

日及賦序

頌

賢明頌

菊頌

銘

椒華銘

蔽髻銘

菊銘

箴

市長箴

誄

魏相國舞陽宣文侯司馬公誄

七

七唱

雜文

隸書體

戒火文

樂歌

晉四廂樂歌

王公上壽酒歌

正旦大會行禮歌 十五章

詩

中宮詩二首

其一

其二

行詩

遊仙詩

漢魏六朝百三家集卷五十二目錄

欽定四庫全書

漢魏六朝百三家集卷五十二

明 張溥 輯

晉成公綏集

賦

天地賦

有序

賦者貴能分賦物理敷演無方天地之盛可以致思矣歷
觀古人未之有賦豈獨以至麗無文難以辭贊不然何

其闕哉遂為天地賦

惟自然之初載兮衍虛無而玄清太素紛以溷清兮始有
物而混成何一元之茫昧兮廓開闢而著形爾乃清濁剖
分玄黃判離太極既殊是生兩儀星辰煥列日月重規天
動以尊地靜以卑昏明迭炤或盈或虧陰陽協氣而代謝
寒暑隨時而推移三才殊性五行異位千變萬化繁育庶
類授之以形稟之以氣色表文采聲有音律覆載無方流
形品物鼓以雷霆潤以慶雲八風翱翔六氣氤氲蛟行蠕

動方聚類分鱗殊族別羽毛以羣各含精而容冶咸受範
於陶鈞何滋育之罔極兮偉造化之至神若夫懸象成文
列宿有章三辰燭曜五緯重光河漢委蛇而帶天虹霓偃
蹇於昊蒼望舒弭節於九道羲和正轡於中黃衆星回而
環極招搖運而指方白虎峙據於參昴青龍垂尾於氐房
玄龜匿首於女虛朱鳥奮翼於星張帝皇正坐於紫宮輔
臣列位於文昌垣屏絡繹而珠連三台差池而雁行軒轅
華布而曲列攝提鼎峙而相望若乃徵瑞表祥災變呈異

交會薄蝕抱暈帶珥流逆犯厯譴悟象事蓬容著而妖害
生老人形而主受喜天矢黃而國吉祥彗孛發而世所忌
爾乃旁觀四極俯察地理川瀆浩汗而分流山嶽磊落而
羅峙滄海沆漭而四周懸圃隆崇而特起昆吾嘉於南極
燭龍曜於北陟扶桑高於萬仞尋木長於千里崑崙鎮於
陰隅赤縣據於辰巳於是八十一域區分方別風乖俗異
險斷阻絕萬國羅布九州並列青冀白壤荆衡塗泥海岱
赤埴華梁青黎充帶河洛揚有江淮辨方正土經略建

邦王圻九服列國一同連城比邑深池高墉康衢交路
四達五通東至暘谷西極秦濛南暨丹穴北盡空桐遐
方外區絕域殊鄰人首蛇軀鳥翼龍身衣毛被羽或介
或鱗棲林浮水若獸若人居乎大荒之外處於巨海之
濱於是六合混一而同宅寓宙結體而括囊元運渾流
而無窮陰陽循度而率常回動糾紛而乾乾天衡不息
而自彊統羣生而載育人託命於所繫尊太一於上皇
奉萬神於五帝故萬物之所宗必敬天而事地若乃共

工赫怒天柱摧折東南俄其既傾西北豁而中裂斷鼇足而續毀鍊玉石而補缺豈斯事之有徵將言者之虛設何陰陽之難測偉二儀之夸濶坤厚德以載物乾資始而至大俯盡鑒於有形仰蔽視於所蓋游萬物而極思故一言於天外

木蘭賦

有序

許昌西園中木蘭樹余往觀之遂為賦曰

覽衆樹之列植嘉木蘭之殊觀至於玄冥授節猛寒嚴

烈我我堅冰霏霏白雪木應霜而枯零草隨風而摧折
顧青翠之茂葉繁綺旒之弱條諒抗節而矯時獨滋茂
而不彫

雲賦

於是玄氣仰散歸雲四旋冰消瓦離奕奕翩翩去則滅
軌以無迹來則幽闇以杳冥舒則彌綸覆四海卷則消
液入無形或狎獵鱗次參差交錯上捷業以梁倚下壘
碗而相薄狀歲鬼其不安吁可畏而欲落或粲爛綺藻

若畫若規繁縟成丈一續一離或繡文錦章依微要妙
繇邈凌虛輕翔浮漂

柳賦

宅京宇之西偏濱犢鼻之清渠啓橫門於大路臨九達
之通衢愍行旅之靡休樹雙柳於衛隅彌年載而成陰
紛嬋媛而扶疎

琵琶賦

八音之用誦於典藝簫韶九奏物有容制惟此琵琶興

自末世爾乃託巧班輸妙意橫施因形造美洪殺得宜
柄如翠虬之仰首盤似靈龜之觚觚臨樂則齊州之丹
桂拊柱則梁山之象犀挽以玳瑁格以瑤枝若夫盤圖
合靈太極形也三材片合兩儀生也分柱列位歲數成
也回窻華表日月星也

大河賦

覽百川之弘壯兮莫尚美於黃河潛崑崙之峻極兮出
積石之嵯峨登龍門而南遊兮拂華陰與曲阿凌砥柱

而激湍兮踰汭洛而揚波體委蛇於后土兮配雲漢於
穹蒼貫中夏之畿甸兮經朔秋之遐荒歷二周之北境
兮流三晉之南鄉秦自西而啓壤兮齊據東而畫疆殷
徒涉而永固衛遷濟而遂強趙決流而却魏嬴引溝而
滅梁思先喆之攸歎何水惠之難量

琴賦

伯牙彈而騶馬仰秣子綦揮而玄鶴齊鳴清角發而陽
氣亢白雲奏而風雨零

時雨賦

兩儀協合二氣烟煴洪川起波名山興雲

棄故筆賦有序

治世之功莫尚於筆能舉萬物之形序自然之情即聖人之志非筆不能宣實天地之偉器也

有倉頡之竒生列四目而兼明慕羲氏之畫卦載萬物於五行乃發慮於書契採秋毫之穎芒如膠漆之綢繆結三東而五重建犀角之玄管屬象齒於織鋒染青松

之微煙著不泯之永蹤則象神仙人皇九頭式範羣生
異體怪軀注王度於七經訓河洛之識緯書日月之所
躔別列宿之舍次乃皆是筆之勛人日用而不寤乞盡
力於萬機卒見棄於行路

芸香賦

美芸香之修潔稟陰陽之淑精去原莖之蕪穢植廣廈
之前庭莖類秋竹葉象春楸

烏賦 有序

有孝鳥集余之廬乃喟爾而歎曰余無仁惠之德祥禽
曷為而至哉夫鳥之為瑞久矣以其反哺識養故為吉
鳥是以周書神其流變詩人尋其所集望富者瞻其爰
止愛屋者及其增歎茲蓋古人所以為稱若乃三足德
靈國有道則見國無道則隱斯乃鳳鳥之惠何以加焉
鵬惡鳥而賈生懼之鳥善禽而吾嘉焉懼惡而作歌嘉
善而賦之不亦可乎

惟玄鳥之令鳥兮性自然之有識應炎陽之純精兮體

乾剛之至色望仁里以迴翔兮翮羣鳴以拊翼差自託
於君子兮心雖適而不逼起彼高林集此叢灌棲息重
陰列巢布翰繽紛霧會徊徨塵亂來若雨集去如雲散
哀鳴日夕鼓翼昧旦噫啞相和音聲可玩嗟斯鳥之克
孝兮心識養而知慕同蓼莪之報惠兮裒凱風之至素
離既壯而能飛兮乃銜食而反哺遊朝霞而凌厲兮飄
輕翥於玄冥有崑山之奇類兮體殊形而玉趾凌西極
以翔翔兮為王母之所使時應德而來儀兮介帝王之

繁祉入中州而武興兮集林木而軍起能休祥於有周
兮矧貞明於吉士嘉茲烏之淑良兮永歡樂而靡已

陰霖賦

百川汎濫潢潦橫流沈竈生龜中庭運舟

延賓賦

延賓命客集我友生高談清晏講道研精閭閻侃侃娛
心肆情

嘯賦

逸羣公子體竒好異傲世忘榮絕棄人事睎高慕古長
想遠思將登箕山以抗節浮滄海以游志於是延友生
集同好精性命之至機研衛惠之玄奧愍流俗之未悟
獨超然而先覺狹世路之阨僻仰天衢而高蹈邈跨俗
而遺身乃慷慨而長嘯於是曜靈俄景流光濛汜逍遙
攜手踟躕步趾發妙聲於丹脣激哀音於皓齒響抑揚
而潛轉氣衝鬱而標起協黃宮於清角雜商羽於流徵
飄游雲於泰清集長風乎萬里曲既終而響絕遺餘玩

而未已良自然之至音非絲竹之所擬是故聲不假器
用不借物近取諸身役心御氣動脣有曲發口成音觸
類感物因歌隨吟大而不滲細而不沈清激切於竿箏
優潤和於瑟琴玄妙足以通神悟靈精微足以窮幽測
深收激楚之哀荒節北里之奢淫濟洪災於炎旱反亢
陽於重陰唱引萬變曲用無方和樂怡懌悲傷摧藏時
幽散而將絕中矯厲而慨慷徐婉約而優游紛繁驚而
激揚情既思而能反心雖哀而不傷總八音之至和固

極樂而無荒若乃登高臺以臨遠披丈軒而騁望喟仰
拊而抗首嘈長引而憫亮或舒肆而自反或徘徊而復
放或冉弱而柔撓或澎湃而奔壯橫鬱鳴而滔洄洌繚
眇而清昶逸氣奮湧繽紛交錯列列颺揚啾啾響作奏
胡馬之長嘶迴寒風乎北朔又似鴻雁之將雛羣鳴號
乎沙漠故能因形創聲隨事造曲應物無窮機發響速
怫鬱衝流參譚雲屬若離若合將絕復續飛廉鼓於幽
隧猛虎應於中谷南箕動於穹蒼清飈振乎喬木散滯

積而播揚蕩埃霑之溷濁變陰陽之至和移淫風之穢俗
若乃游崇岡陵景山臨巖側望流川坐磐石漱清泉藉
皋蘭之猗靡蔭修竹之嬋娟乃吟咏而發散聲絡繹而
響連舒蓄思之悵憤奮久結之纏緜心滌蕩而無累志
離俗而飄然若夫假象金革擬則陶匏衆聲繁奏若笳
若簫礪硠震隱訇礚礚嘈發徵則隆冬熙蒸騁羽則嚴
霜夏凋動商則秋霖春降奏角則谷風鳴條音均不恒
曲無定制行而不流止而不滯隨口吻而發揚假芳氣

而遠逝音要妙而流響聲激曜而清厲信自然之極麗
羗殊尤而絕世越韶夏興咸池何徒取異乎鄭衛於是
絳駒結舌而喪精王豹杜口而失色虞公輟聲而止歌
寧子斂手而歎息鍾期棄琴而改聽尼父忘味而不食
百獸率舞而抃足鳳皇來儀而拊翼乃知長嘯之奇妙
蓋亦音聲之至極

蜘蛛賦

獨星懸於浮處遂設網於四隅南連大廡北接華堂左

馮廣厦右依高廊吐絲屬絡布網引網纖羅絡幕綺錯
交張於是蒼蚊夕起青蠅昏歸營營羣衆薨薨亂飛罍
翼繞足胃絲罹圍衝突必獲犯者無遺

螳螂賦

仰及茂陰俯緣條枝冠角我我足翅跂跂尋喬木而上
綴從蔓草而下垂戢翼鷹峙延頸鵠望推翳徐翹舉斧
高抗鳥伏地騰鶴擊隼放俯飛蟬而奮猛臨螭蛄而逞
壯距車輪而軒翥固齊侯之所尚乃有翩翩黃雀舉翮

高揮連翔枝幹或鳴或飛覩茲螳螂將以療飢厲觜脅
翼其往如歸

洛襖賦

考古日簡良辰被除解襖同會洛濱妖童媛女嬉遊河
曲或振纖手或濯素足臨清流坐沙場列罍樽飛羽觴
鴻雁賦

余嘗遊乎河澤之間是時鴻雁應節而羣至望川以奔
集夫鴻漸著羽儀之歎小雅作於飛之歌斯乃古人所

以假象興物有取其美也余又竒其應氣而知時故作
斯賦

辰火西流秋風屬起軒翥鼓翼抗志萬里過雲夢以娛
遊投淮湘而中憩晝顧眺以候遠夜警循而相衛

鸚鵡賦序

鸚鵡小禽也以其能言解意故為人所愛玩育之以金
籠升之以堂殿可謂珍之矣未得鳥之性也

日及賦序

日及者華甚鮮茂榮於仲夏訖於孟秋

頌

賢明頌

於鑠姜后光配周宣非義不動非禮不言晏起早朝永
巷告愆王用勤政萬國以虔

菊頌

先民有作詠茲秋菊綠樹黃花菲菲或或芳躰蘭蕙茂
過松栢其莖可玩其葩可服味之不已松喬等福

銘

椒華銘

嘉哉芳椒載繁其實厥味惟珍蠲除百疾肇惟歲始月
正元日永介眉壽以祈初吉

蔽髻銘

或造茲髻南金翠翼明珠星列繁華致飾

菊銘

數在三九時惟斯生

箴

市長箴

貿遷有無市朝有處人以攸貿貨以攸叙交易而退各
得其所曹參相齊清淨以義奸不可擾顧託有寄市臣
掌肆收告執事

誄

魏相國武陽宣文侯司馬公誄

應期降命篤生我公九德聿修百行蕪通文皇踐位龍

飛天衢協贊大命啓迪靈符光我聖主齊德有虞受茲
介祉封國建畿入總納言敷化衡機出登上將奮武明
威皇輿省方作鎮于許旌旗旣反撫戎荆楚巴蜀作寇
侵我邊疆乃眷西顧董統雍京丹麾所指莫之敢抗仁
濟宇內威懾外荒流惠零雨齊美甘棠加命九錫尊位
相國比王齊魯以崇碩德

七

七唱

奮長袖以颺迴擢纖腰以烟起鎮抗首而委蛇颺頓足而立峙紛龍轉而鳳翔忽若倒而中止

雜文

隸書體

御覽作
隸勢

皇頡作文因物構思觀彼鳥跡遂成文字燦矣成章閱之後嗣存載道德紀綱萬事俗所傳述實繇書記時變巧易古今各異蟲篆既繁草藁近偽適之中庸莫尚于隸規矩有則用之簡易隨便適宜亦有弛張操筆假墨抵押

毫芒彪煥礫落形體抑揚芬葩連屬分間羅行爛若天
文之布耀蔚若錦繡之有章或輕拂徐振緩按急挑挽
橫引縱左牽右繞長波鬱拂微勢縹緲工巧難傳善之
者少應心得手必繇意曉爾乃動纖指舉弱腕握素紈
染玄翰彤管電流雨下電散點點駐折拔擿挫安按續紛
絡繹華藻粲爛絢緼卓犖一何壯觀繁縟成文又何可
玩章周道之郁郁表唐虞之輝煥若乃八分璽法殊好
異制分白賦黑綦布星列翹首舉尾直刺邪擻繾綣結

體剗彩奪節或若虬龍盤游蛺蝶軒翥鸞鳳翱翔矯翼
欲去或若鷲鳥將擊并體抑怒良馬騰驤奔放向路仰
而望之鬱若霄霧朝升遊烟連雲俯而察之凜若清風
厲水漪瀾成文垂象表式有模有楷形功難詳聊舉大
體

形管二句一作寶
輪電流形管雲散

戒火文

余家遭火屋宇焚盡器用廓然乃造于四鄰以為戒火
文曰

經籍為灰篇章為炭

樂歌

晉四廟樂歌

王公上壽酒歌

上壽酒樂未央大晉應天慶皇帝永無疆

正旦大會行禮歌

十五章

穆穆天子光臨萬國多士盈朝莫非俊德流化罔極王
猷允塞嘉會置酒嘉賓充庭羽旄曜辰極鐘鼓振太清

百辟朝三朝或或明儀刑濟濟鏘金聲玉振

禮樂具宴嘉賓眉壽祚聖皇景福惟日新羣后戾止有
來雍雍獻酬納贄崇此禮容豐肴萬俎旨酒千鍾嘉賓
盡宴樂福祿咸攸同

樂哉天下安寧道化行風俗清簫韶作詠九成年豐穰
世泰平至治哉樂無窮元首聰明股肱忠澍豐澤揚清
風

嘉瑞出靈應彰麒麟見鳳凰翔醴泉湧流中唐嘉禾生

穗盈箱降繁祉祚聖皇承天位統萬國受命應期授聖
德四世重光宣開洪業景克昌文欽明德彌彰肇啓晉
邦流祚無疆

泰始建元鳳皇龍興龍興伊何享祚萬乘奄有八荒化
育黎丞圖書煥炳

晉書作
既煥

金石有徵德光大道熙隆被

四表格皇穹奕奕萬嗣明明顯融高朗令終保茲永祚
與天比崇

聖皇君四海順人應天期三葉合重光泰始開洪基明

曜參日月功化侔四時宇宙清且泰黎庶咸雍熙善哉
雍熙

惟天降命翼仁祐聖於穆三皇載德彌盛總齊璇璣光
統七政百揆時序化若神聖四海同風興至仁濟民育
物擬陶鈞擬陶鈞垂惠潤皇皇羣賢莪莪英俊德化宣
芬芳播來肩

播來肩垂後昆清廟何穆穆皇極闢四門皇極闢四門
萬機無不綜亶亶翼翼樂不及荒飢不遑食大禮既行

樂無極

登崑崙上層城乘飛龍升泰清冠日月佩五星揚虹蜺
建彗旌披慶雲蔭繁榮覽八極遊天庭順天地和陰陽
序四時曜三光張帝網正皇綱播仁風流惠康邁洪化
振靈威懷萬方納九夷朝閭闔宴紫微

建五旗羅鐘虞列四縣奏韶武鏗金石揚旌羽縱八佾
巴渝舞詠雅頌和律呂于胥樂樂聖主

化蕩蕩清風泄總英雄御俊傑開宇宙掃四裔光緝熙美聖

哲超百代揚休烈流景祚顯萬世

皇皇顯祖翼世佐時寧濟六合受命應期神武鷹揚大
化咸熙廓開皇衢用成帝基

光光景皇無競惟烈匡時拯俗休功蓋世宇宙既康九
域有截天命降鑒啓祚明哲

穆穆烈考克明克雋實天生德誕膺靈運肇建帝業開
國有晉載德奕世垂慶洪胤

明明聖帝龍飛在天與靈合契通德幽玄仰化青雲俯

育重淵受靈之祐於萬斯年

詩

中宮詩二首

按樂府載張華晉中宮
所歌一首體與此同

其一

殷湯令妃有莘之女仁教內修度義以處清謐後宮九
嬪有序尹為媵臣遂作元輔

其二

天地不獨立造化由陰陽乾坤垂覆載日月曜重光治

國先家道立教起閨房二妃濟有虞三母隆周王塗山
興大禹有莘佐成湯齊晉霸諸侯皆賴姬與姜關雎思
賢妃此言安可忘

行詩

一云塗
中作

洋洋熊耳流巍巍伊闕山高岡碣崔嵬雙阜夾長川素
石何磷磷水禽何翩翩遠涉許潁路顧思邈綿綿鬱陶
懷所親引領情惘然

遊仙詩

盛年無幾時奄忽行欲老那得赤松子從學度世道西
入華陰山求得神芝草珠玉猶戴土何惜千金寶但願
垂無窮與君長相保



漢魏六朝百三家集卷五十二

欽定四庫全書

集部

漢魏六朝百三家集卷五十三至五

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官中書臣高中

謄錄監生臣李安國

欽定四庫全書

漢魏六朝百三家集卷五十三

晉張載張協集題詞

晉代文人有二陸三張之稱三張者孟陽載景
陽協季陽亢也季陽才藻不逮二昆文不甚顯
孟陽濠汜司隸延譽景陽七命舉世稱工安平
棣華名豈虛得然揆其旨趣語亦猶人不能不
遠漸枚叔近媿平原也劔閣一銘文章典則確

欽定四庫書

漢書卷五十三目錄

石蜀山古今榮遇景陽文稍讓兄而詩獨勁出
蓋二張齊驅詩文之間互有長短若論才家庭
則伯難為兄仲難為弟矣二子守道嫉衆貪位
高尚之懷每形詩詠時或疵其玄之尚白及觀
二鳳齊傾金谷並隕華亭上蔡嗟呼歎晚然後
知達人蚤識長謠二疏高歌招隱所以能自脫
于巫山之火也

目錄

賦

濛汜池賦

敘行賦

鄴酒賦

扇賦

安石榴賦

論

權論

頌

平吳頌

銘

劒閣銘

洪池陂銘

匕首銘

詩

登成都白菟樓

贈虞顯度

招隱詩

七哀詩

其一

其二

霖雨

擬四愁詩

其一

其二

其三

其四

述懷詩

失題

又

又

漢魏六朝百三家集卷五十三目錄

欽定四庫全書

漢魏六朝百三家集卷五十三

明 張溥 輯

晉張載集

賦

濛汜池賦

麗華池之湛澹開重壤以停源激通渠於千金承纏洛
之長川挹洪流之汪濊包素瀨之寒泉既乃北通醴泉

東入紫宮左面九市右帶閭風周墉建乎其表洋波廻
乎其中幽清傍集潛流獨注仰承河漢吐納雲霧緣以
采石殖以嘉樹水禽育而萬品珍魚產而無數蒼苔汎
濫條修無榦綠葉覆水元陰夾岼紅蓮煒而秀出繁葩
葩以煥爛遊龍曜翼而上征翔鳳因儀而下觀想白日
之納光觀洪暉之皓盱於是天子乘玉輦時遨遊排金
門出千秋造綠池鏡清流翳華蓋以逍遙攬魚釣之所
收纖緒挂而鱣鮪來芳餌沉而鯉鯽浮豐夥踰於巨壑

信可樂以忘憂

敘行賦

歲大荒之孟夏余將往乎蜀都脂輕車而秣馬循路軌
以西徂朝發軔於京寓兮夕予宿於轅洛踐有周之舊
墟陟邱荒以寥廓讚王孫於北門問九鼎於東郭寔公
目之所卜曷斯水之瀆薄入函谷而長驅歷新安之西
阜行逶迤以登降涉二嶠之重阻經嶽岑之險巖想姬
文之避雨出潼關以廻逝仰華岳之崔嵬動大禹之疏

導豁龍門之洞開舍予車以步趾玩卉木之璀璨翳青
青之長松蔭肅肅之高柞緣阻岑之絕崖蹈偏梁之懸
閣石壁立以切天岌嵒瑰其欲落超陽平而越白水稍
幽蔓以廻深乘重巒之百層轉木末於九岑浮雲起於
穀下零雨集於麓林上昭昧以青陽下杳冥而晝陰聞
山鳥之晨鳴聽元猿之夜唵雖處者之所樂嗟寂寞而
愁予心造劒閣之崇關路盤曲以晦藹山崢嶸以峻狹
仰青天其如帶兼習坎之重固形束隘以要害豈乾坤

之分域將隔絕乎內外

鄴酒賦

惟賢聖之興作貴垂功而不泯加康狄之先識亦應天
而順人擬酒旂於玄象造甘醴以順神雖賢愚之同好
似大化之齊均物無往而不變獨居舊而彌新經盛衰
而無廢歷百代而作珍若乃中山冬啓醇酎秋發長安
春御洛浪夏設漂蟻萍布分香酷烈播殊美於聖載信
人神之所悅未聞珍酒出於湘東既不顯於皇都乃潛

淪於吳邦往逢天地之否運今遭六合之開通播殊美
于聖代宣至味而大同匪徒法用之窮理信泉壤之所
鍾故其為酒也殊功絕倫三事既節五齊必均造釀在
秋告成在春備味滋和體色淳清宣御神志導氣養形
遣憂消患適性順情言之者嘉其旨美味之者棄事忘
榮於是糾合同好以遨以遊嘉賓雲會矩坐四周設金
樽於南楹酌浮觴以施流備鮮肴以綺進錯時膳之珍
羞禮義攸序是獻是酬頽顏既發溢思凱休德音晏晏

宏此徽猷咸德至以自足願棲遲於一邱於是懽樂既
洽日薄西隅主稱湛露賓歌驪駒僕夫整馬言旋其居
乃馮軾以廻軌騁輕駟於通衢反衡門以隱跡覽前聖
之典謨感夏禹之防微悟儀氏之見疏鑒往事而作戒
罔非酒而惟愆哀秦穆之既醉纖良人而棄賢嘉衛武
之能悔著屢舞於初筵察成敗於往古垂將來於茲篇

扇賦

有翔雲之素鳥體自然之至潔飄縞羽於清霄擬妙姿

於白雪俯濯素於河漢仰晞光於日月雙趾蹶而騰虛
六翮揮而風厲於是傲世公子倣儻蹕蹕遺物獨出樂
此天爵飛蒲氏之修蟠紫子余之纖繳弋翔冥之鷗雞
連王子之白鶴裁輕翼以為扇發清風於勁翮若乃搜
奇選妙絕色寡雙鵠質皦鮮元的點鋒修短雖異而光
彩齊同故易稱可以為儀詩美肅肅之容是以停之如
栖鵠揮之如驚鴻飄纓蕤於軒幌發暉曜於羣龍夫裂
素製圓剖竹為方五明起於名都九華興於上京

安石榴賦

有石榴之奇樹肇結根於西海仰青春以啓萌晞希夏
以發采輝光垂綠擢幹曜鮮煥若羣翡俱栖爛若百枝
並然煥乎郁郁焜乎煌煌仰映清霄俯燭蘭堂似西極
之若木譬東谷之扶桑於是天廻節移龍火西夕流風
晨激行露朝白紫房既熟頰膚自坼剖之則珠散含之
則冰釋

論

權論

夫賢人君子將立天下之功成天下之名非遇其時曷由致之哉故嘗試論之殷湯無鳴條之事則伊尹有莘之匹夫也周武無牧野之陣則呂牙渭濱之釣翁也若茲之類不可勝紀蓋聲發響應形動影從時平則才伏世亂則奇用豈不信歟設使秦莽脩三王之法時致隆平則漢祖泗上之健吏光武春陵之俠客耳況乎附麗者哉故當其有事也則足非千里不入於輿亦非斬鴻

不韜於鞘是以駕蹇望風而退頑鈍未試而廢及其無
事也則牛驥共牢利鈍齊列而無長塗屏革以決之此
離朱與瞽者同眊之說也處守平之世而欲建殊常之
勲居太平之際而吐違俗之謀此欲却步而登山鬻章
甫於越也漢文帝見李廣而歎曰惜子不遇當高祖時
萬戶侯豈足道哉故智無所運其籌勇無所奮其氣則
勇怯一也才無所騁其能辨無所展其說則頑慧均也
是以吳榜越船不能無水而浮青虬赤螭不能無雲而

飛故和璧之在荆山隋珠之潛重川非遇其人焉有連
城之價照車之名乎青駸繁霜繫於籠中何以效其撮
東郭於羈下也白猿元豹藏於靈檻何以知其接垂條
於千仞也孱夫與烏獲訟力非龍文赤鼎無以明之蓋
聶政與荊卿爭勇非強秦之威孰能辨之故餓夫庸隸
抱關屠釣之倫一旦而都卿相之位建金石之號者或
有懷顏孟之術抱伊管之略沒世而不齒者此言有事
之世易為功無為之時難為名也若斯湮滅而不稱曾

不足以多說況夫庸庸之徒少有不得意者則自以為枉伏莫不飾小辨立小善以偶時結朋黨聚虛譽以驅俗進之無補於時退之無損於化而世主相與雷同齊口吹而煦之豈不哀哉今士循常習故規行矩步積階級累閥閱碌碌然以取世資若夫魁梧傑卓蹀躞儻之徒直將伏死嶽岑之下安能與步驟共爭道里乎至如軒冕黻班之士苟不能匡化輔政佐時益世而徒俯仰取容要榮求利厚自封之資豐私家之積此沐猴而

冠耳尚馬足道哉

頌

平吳頌

并序

聞之前志堯有丹水之陣舜有三苗之誅此聖帝明王
平暴靜亂未有不用兵而制之也夫太上成功非頌不
顯情動於中非言不彰獫狁旣攘出車以興淮夷旣平
江漢用作斯故先典之明志不刊之美事烏可闕歟遂
作頌曰

上哉仁聖曰惟皇晉光澤四表繼天垂胤帝道煥於唐
堯義聲邈乎虞舜蠢爾鯨吳憑山阻水肆虐播毒而作
豺虺菁茅闕而不貢越裳替其白雉正九伐之明典申
號令之舊章布亘地之長羅振天網之修綱制征期於
一朝並箕驅而幕張爾乃援丹陽之峻壁屠西陵之高
墉日不移晷羣醜率從望會稽而振鐸臨吳地而奮旅
衆軍競趨烽颺具舉挫其輕銳走其守禦

銘

劔閣銘

巖巖梁山積石峨峨遠屬荆衡近綴岷嶓南通邛笮北
達褒斜狹過彭碣高踰嵩華惟蜀之門作固作鎮是曰
劔閣壁立千仞窮地之險極路之峻世濁則逆道清斯
順閉由往漢開自有晉秦得百二并吞諸侯齊得十二
田生獻籌矧茲狹隘土之外區一人荷戟萬夫超超形
勝之地非親勿居昔在武侯中流而喜山河之固見屈
吳起興實在德險亦難恃洞庭孟門二國不祀自古迄

今天命匪易憑阻作昏鮮不敗績公孫旣滅劉氏街壁
覆車之軌無或重跡勒銘山阿敢告梁益

洪池陂銘

開源東注出自城池魚鱉熾殖水鳥盈涯菱藕狎蕩
稻連畦漸臺中起列館參差惟水泱泱厥大難訾

七首銘

先民造制戒豫惟詳七首之設應速用近既不忽備亦
無輕忽利以彰彰功以道隱

詩

登成都白菟樓

重城結曲阿飛宇起層樓

一作區

累棟出雲表峽窳臨太

虛高軒啓朱扉迴望暢八隅西瞻岷山嶺嵯峨似荆巫
蹲鴟蔽地生原隰殖嘉蔬雖遇堯湯世民食恒有餘鬱
鬱少城中岌岌百族居街術紛綺錯高甍夾長衢借問
楊子宅想見長卿廬程卓累千金驕侈擬五侯門有連
騎客翠帶腰吳鉤鼎食隨時進百和妙且殊披林採秋

橘臨江釣春魚黑子過龍醢果饌踰蟹蜆芳茶冠六清
溢味播九區人生苟安樂茲土聊可娛

贈虞顯度

疇昔協蘭芳繾綣在華年嘉好結平素分著寮友前謂
得終遐日綢繆永周旋吾子遭不造邁閔丁憂艱俾我
失良朋誰與吐語言一日為三秋歲况乃三年離居一
何濶結思如迴川

招隱詩

出處雖殊塗居然有輕易山林無悔恠人間實多累鵝
雛翔窮冥蒲且不能視鶴鷺遵皋渚數為矰所繫隱顯
雖在心彼我共一地不見巫山火芝艾豈相離去來捐
時俗超然辭世偽得意在邱中安事愚與智

七哀詩二首

北芒

邱一作

何壘壘高陵有四五借問誰家墳皆云漢世

主恭文遙相望原陵鬱撫撫季世

一作葉

喪亂起賊盜如

豺虎毀壤過一坏便房啓幽戶珠柙

一作匣

離玉體珍寶

見剽虜園寢化為墟周墉無遺堵蒙龍荆棘生蹊逕登
童豎狐兔窟其中蕪穢不復埽頽隴並壑發萌隸營農
圃昔為萬乘君今為邱中土感彼雍門言悽愴哀今一作
往古

其二

秋風吐商氣蕭瑟掃前林陽鳥一作鳥收和響寒蟬無餘

音白露中

一作朝

夜結木落柯條森朱光馳北陸浮景忽

西沉顧望無所見唯覩松柏陰肅肅高桐枝翩翩棲孤

禽仰聽離鴻鳴俯聞蜻蛚吟哀人易感傷觸物增悲心
邱隴日已遠纏綿彌思深憂來令髮白誰云愁可任裴
徊向長風淚下沾衣襟

霖雨

霖雨餘旬朔濛昧日夜墜何以解愁懷置酒招親類
啾啾絲竹作伶人奏奇秘悲歌結流風逸響迴秋氣

擬四愁詩四首

我所思兮在南巢欲往從之巫山高登崖遠望涕泗交

我之懷矣心傷勞佳人遺我笥中布何以贈之流黃素
願因飄風超遠路終然莫致增永慕

其二

我所思兮在朔湄欲往從之白雪飛登崖遠望涕泗頽
一作垂我之懷矣心傷悲佳人遺我雲中翮何以報之連
城璧願因歸鴻超遐翮終然莫致增永積

其三

我所思兮在隴原欲往從之隔太山登崖遠望涕泗漣

我之懷矣心傷煩佳人遺我雙角端何以贈之雕玉環
願因行雲超重巒終然莫致增永嘆

其四

我所思兮在營州欲往從之路阻修登崖遠望涕泗流
我之懷矣心傷憂佳人遺我綠綺琴何以贈之雙南金
願因流波超重深終然莫致增永吟

述懷詩

跋涉山川千里告辭楊子哭岐墨氏感絲雲乖雨絕心

乎愴而

失題

江南都蔗釀液豐沛三巴黃甘瓜州素柰凡此素品殊
美絕快渴者所思銘之常帶

同前

白日隨天迴瞰瞰圓如規踴躍湯谷中上登扶桑枝

同前

氣力漸衰損髣髴終以皓昔為春月華今為秋日艸

漢魏六朝百三家集卷五十三